

DES. ERASMI

Roterodami

CONSULTATIO

De

Bello Turcis inferendo.

*Opus cum cura recens
editum.*



LUGDUNI BATAVORUM,
Ex officinâ JOANNIS MAIRE.
c1o 1o c XLIII.

CONSTITUTION



DES. ERASMUS

Roterodamus,

Ornatissimo Viro,

D. IOANNI RINCKO,

Iurisprudentia celebri,

S. D.



Uoniam cum tuis literis, Ornatissime Vir, nec eruditione, nec elegantiā, nec humanitate mihi videbar unquam paria facturus, huc induxi animum, ut quanto cæteris omnibus eram inferior, tanto verborum copia vel turba potius superarem. Cuiusmodi telam ordiantur monarchæ, videmus omnes. De colligendis belli nervis solliciti sunt permulti, de ducibus & machinis nonnulli, de mutanda in melius vita, quod est totius negotii caput, & ad universos ex æquo pertinet, vix quenquam video cogitare. Nec satis admirari possum, unde tantus stupor Christiania.

stianorū animos occuparit. Quum tot
plagis divinitus admoncamur, ut &
paucioribus sint afflicti Ægyptii, &
mitiores sint, quæ referuntur in Apo-
calypsi Ioannis: tamen plus quam
Phryges, domini toties ad meliorem
frugem provocati severitate, nihilo
reddimur meliores; imo potius tan-
quam deplorata mancipia, collecto ad-
versus verbera callo, benignitate nu-
minis abutimur ad peccandi perva-
ciam; & adversus misericordiam tem-
porariis malis nos invitantis ad vitæ
correctionē, præfractiones evadimus.
Bellis, latrociniiis, civilibus tumulti-
bus, factionibus, expilationibus, pe-
stilentiis, penuriæ, fami, in tantum
assuevimus, ut iam pro malis non ha-
beantur. Fecit Deus, quod solent me-
dici fideles: novavit remedia, immi-
sit inauditum & immedicabile lepræ
genus. Quam nescio quare vulgus
appellet scabiem Gallicam! quum sit
omnium gentium communis. Percus-
sit hominum genus ulcere vere pessi-
mo. Tam horribile malum adeo non
docuit nos castimoniam, ac sobrieta-
tem,

tem, ut plane verterimus in iocum. Nam eo res devenisse videtur, ut inter aulicos, bellos ac festivos, quemadmodum sibi videntur, homines, ignobilis ac rusticanus habeatur, qui sit ab hoc immunis malo. Quid hoc aliud est, quam domino nos castiganti oppedere, mediumque, quod dici solet, digitum ostendere? Successit dogmatum irreconciliabile dissidium, nec id sane simplex; cui citra controversiam ansam ex parte non minima præbuerunt corrupti mores eorum, quorum sale condiri debuerat populi stultitia. Nec qui traducuntur, de corrigenda vita cogitant, nec qui traducunt, melioris vitæ specimen exhibent. Ac minimum abest, quin hoc quoque tam atrox rei Christianæ malum, in fabulam ludumque verterimus. Quid est minarum, quas Levitici 26, & Deuteronomii 28, ob violata ipsius præcepta, Dominus intentat, quod in nos non inciderit? Tot iam annis quid non bellorum vidimus? Quæ caret ora cruore nostro? Quoties sensimus Turcicum gladium, ultorem violati

fœderis, quod cum Deo pepigimus? Quod pestilentiarum genus non sumus experti, non minus in agris quam in urbibus, ut fugere nihil aliud esset, quam mutare periculo periculum? Baculum panis quoties sensimus confractum? Quam multi sunt ubique, qui comedunt panes ad pondus, nec saturantur? Nuper in Italia regionum feracissima, quam multi fame perierunt? Fortasse nullus adhuc comedit carnes filiorum ac filiarum suarū. Sed tamen quid aliud quam mutuo laniatu vivimus omnes? Magnates expilant, rusticus quadruplo vendit sua, negotiatores in immensum intendunt precia, opifices quanti volunt locant operas. Unusquisque dolis & artibus circumvenit proximum suum. Vidimus desolata templa magnifica, confracta simulacra, sacerdotes exactos. Nonne pridem immisit in nos bestias agri vastantes omnia, quum rusticorum manus tanta licentia grassarentur? Nec illa maledictio deest nobis, quā commemorat Deuteronomium: Ducuntur uxores, & alius dormit cum illis.

Iam

Iam illa nova non sunt, nos facere
 sementem, unde colligat alius: nos
 plantare vineam, unde non bibamus:
 recipere alienigenas, qui nobis impe-
 rent. Nonne igitur Deus veluti frustra
 consumptis remediis omnibus, loqui
 nobis videtur per prophetam: Super
 quo percutiam vos ultra, addentes
 prævaricationem? Non hæc crudeli-
 tatis vox est, sed summæ misericor-
 diæ. Quemadmodum medicus pa-
 ternum affectum gerens erga ægro-
 tum, discruciatum animo, quum videt
 artes suas morbi violentia superari:
 Charitas tamen, quæ iuxta Paulum,
 sperat omnia, non finit, ut laboran-
 tem pro deplorato conclamatoque de-
 serat. Dum anima, inquit, est, spes
 est: excutit omnem ingenii vim, si
 quod insolitum, si quod efficax phar-
 macum possit excogitare. Ita clemen-
 tissimus Dominus, & humanæ salutis
 avidissimus, inauditis remediis nos
 sollicitat ad vitæ castigationem. Im-
 misit morbum medicis omnibus ut in-
 cognitum, ita immedicabilem, qui
 prodigioso rotatu capitis ac brachio-

rum miserandis modis disscrutiabat viros, fœminas, puellas etiam forma & ætate florentes, adempta interim & mentis sanitate. Nec paucos arripuit diversis in regionibus nova vel phrenesis, vel delirationis species. Nihil hæcenus profectum est. Nuper novum pestilentiaæ genus immisit, letiferum sudorem: quod à Britannis exortum, incredibili celeritate per orbem longe lateque divagatum est, plurimorum exitio, summo terrore omnium, vel quia novum, ut à medicis minimum esset opis, vel quia paucis horis tollit quem arripuit, vel quia subinde repetit quem reliquit, vel quia pernici contagio latissime grassari solet. Agnoscas malum à clementi patre immissum, quod terrore sanaret potius, quam interneccione perderet. Quid hoc est aliud, quam vox domini clamantis, agite pœnitentiam, instat regnum cœlorum? In Psalmis dominus, velut affectus tædio, loquitur: Quadraginta annis proximus fui generatioui huic, & dixi, semper hic errant corde. Nos & annorum numero,

mero, & plagarum atrocitate, superamus Hebræos, utinam non & duricia cordis, semper ad deteriora vergentis, & cum arte studioque medici pugnantis. Nec interim desinit clamare vox prophetica: Hodie si vocem eius audieritis, nolite obdurare corda vestra. Huiusmodi calamitates, quibus subinde tangimur, nihil aliud sunt, quam voces Domini, ad se revocatis. Quemadmodum enim Dominus pollicetur læta servantibus legem, ita non minuitur mala, nisi legem aspernantibus. Quor autem has calamitates immitat, sequitur eodem in loco: ipsi vero rogabunt pro peccatis suis, eo quod abiecerint iudicia mea, & leges meas despexerint. Nec enim penitus abieci eos, neque sic despexi, ut consumerentur, & irritum facerem pactum meum cum eis. Agnoscamus igitur hæc flagella, voces esse Domini, cupientis sanare nos, non perdere; quemadmodum docet Psam. 28; Vox Domini super aquas, hoc est, populos, variis affectibus, variisque doctrinis huc illucque fluctuantes.

Deus maiestatis intonuit, Dominus
super aquas multas, vox Domini in
virtute, vox Domini in magnificen-
tia, vox Domini confringentis ce-
dros, vox Domini intercidentis flam-
mam igneam, vox Domini concu-
tientis desertum, vox Domini præpa-
rantis cervos. Felices sunt, in quibus
hæc omnia agit vox omnipotentis
Domini. Et agit nimirum in omni-
bus, qui non obturant aures suas. U-
tinam vox Domini non intonet in
virtute, quo terrore salubri commo-
veat animos nostros ad pœnitentiam.
Utinam sit in maiestate, ut omnis hu-
mana sublimitas semet illi submittat
ad perfectam obedientiam. Utinam
sit super aqueos animos nostros, in
quibus refrixit charitas, qui dum ab
unico illo bono decessimus, defluxi-
mus sicut aqua, fluctuantes humanis
affectibus, circumacti quolibet
vento doctrinæ. Utinam vox Domi-
ni colligat aquas in unum, & appa-
reat nobis solida tellus fidei, quæ cal-
facta sole charitatis, pariat omne ge-
nus virtutum. Utinam vox Domini
confrin-

confringat in nobis cedros, non quolibet modo, sed & Libani. Habet mundus cedros suas, sed purpureas: habet Ecclesia cedros suas, sed dealbata: Libanus enim Hebræis candorem sonat. Has interdum in altum erigit ambitio, ferocia: ac mundanis quidem excelsæ videntur, spargentes gratum hominibus clari nominis odorem; & immortalitatem quandam meditantur: sed apud Deum humi iacent odoris ingrati. Has cedros utinam confringat vox Domini: proque his erigat olivas frugiferas, quæ lumen alant in domo Dei. Eas nemo potest confringere, nisi vitulus ille saginatus, qui se patri pro nobis immolavit, solus omnium sine exceptione candidus, & filius rhinocerotis, id est, Iudaicæ gentis, quæ spiritu vacua, literam legis velut unicum cornu torserat in Christum: Qui, si per fidem gignatur in nobis, filius erit bicornium, insignis ac dilectus, quandoquidem utrumque cornu obvertemus non in ipsum, sed in affectus carnis. Utinam Domini vox in nobis intercيدات flammam

nam ignis, qua tot iam annis undique
conflagrat orbis Christianus. Simulta-
rum, odiorum, ambitionis, & avari-
tiæ, quibus cupiditatibus toti rapi-
mur in ea, quæ sunt huius mundi! In-
cendium invaluit, occupavit univer-
sum mortalium genus, regnat flamma
victrix. Sola Domini vox potest eam
dividere, sic ut præcipua pars ardoris
feratur in Deum; quod superest, in pro-
ximum; iræ, libidini, ambitioni, ni-
hil tribuatur. Ita fiet, ut Dominus
concuriat desertum nostrum incul-
tum, horridum, noxiisque animanti-
bus refertum. Nam id purgari non
potest, nisi Domini voce concussum.
Habent venatores cornua, quibus fe-
ras è lustris excitent. Mala bestia est
aper, sed peior est avaritia. Mala be-
stia est ursus, sed peior est luxuria. Ma-
la bestia est leo, sed peior est crudeli-
tas. Mala bestia est vipera, sed peior
est invidia. Quod si Dominus sua vo-
ce dignetur concutere omnes deserti
nostri latebras, per veram pœnitent-
iam & confessionem, fiet ex sterili
frugiferum, ex obscuro lucidum, ex
invio

invio pervium, proque noxiis bestiis
 pariet nobis cervos alatis pedibus, qui
 firiant, non ea, quæ sunt huius mun-
 di, cumque mundo præterfluunt, sed
 fontes aquarum salientium in vitam
 æternam. Tunc revelabuntur nobis
 obscura saltuum, ac discussis pravis
 cupiditatibus, quæ militant adversus
 spiritum, resectis dogmatum dissidiis,
 ex deserto fiet templum Domino di-
 catum, in quo concordibus animis,
 eadem voce, omnes instauratori suo
 dicent gloriam. Hæc omnia quo mi-
 nus fiant, in culpa est non Dominus,
 sed nos, qui velut aspidēs surdæ ad vo-
 cem Domini sapienter incantantis,
 obfirmamus aures, alteram admove-
 res terræ, alteram cauda obturantes.
 Quia terram amamus, non audimus
 cœlestia: quia scripturam ad carnis af-
 fectus detorquemus, etiamsi quid au-
 dimus, nobis ipsis inutile reddimus.
 At, qui fieri poterit, ut nobis aperian-
 tur aures? Nam & hoc Dei munus est.
 Sacrificio placandus est, ut aures au-
 diendi nobis adaptet. Eoque clamat:
 Adferre Domino, filii Dei, adferre Do-
 mino

mino filios arietum, adferte Domino gloriam & honorem, adferte Domino gloriam nomini eius. Adorate Dominum in atrio sancto eius. Filii Dei professione quidem sunt omnes, per mysticum renati lavacrum, tametsi vox hæc peculiariter appellat eos qui in Apostolorum vicem successerunt. Hos alloquitur Propheta: Si vere filii Dei estis, adferte quod sitit, quod amat, ob quod assidue clamat Dominus. Quid adferemus? filios arietum. Sitis ipsi arietes, & idonei gregis dominici duces, imitantes principem pastorum Iesum, videlicet insignem illum arietem, quem Abraham vidit hærentem in vepribus. Ille semet immolavit patri; immolate & vos Domino membra vestra, quæ sunt super terram, ut vestra doctrina, piisq; moribus, offeratis agnos spiritu masculos, & arietum filios: afferatis autem non vobis, sed Domino, cuius est grex. Pharisei obambulabant per mare, & aridam, ut adducerent profelytos. Verum eos non offerebant Domino, sed sibi. Ita dilatanda est ditio Christiana, ut offeramus

mus non canes, aut fues, sed filios arietum, eosque non in nostram gloriam aut emolumentum vertamus, sed ut ministri fideles offeramus Domino. Alioqui clamabit: Multiplicasti gentem, sed non magnificasti lætitiā. Huic igitur terque quaterque adferre, filii Dei, filios arietum, non quærentes quæ vestra sunt, sed quæ Iesu Christi. Nodum attingit Psalmus, unde prope modum omnis populi perniciēs oritur. Nec ea vox tantum pertinet ad primarios ecclesiæ ministros, verum etiam ad principes mundanos. Talis enim fere populus est, quales sunt principes, quanquam interdum & ob populi merita, dominus patitur regnare hypocritam. Quandoquidem nullus hypocrita perniciosior ecclesiæ, quam qui pastorem professus agit lupum, aut regem professus agit tyrannum. Omnis quidem hypocrisis invisa est Christo veritati, sed hac ut nulla nocentior, ita nulla Deo invisior. Ergo, vos filii Dei, favete gloriæ Dei, ac vestrum esse ducite, quicquid illius est. Si quid per vos agit Dominus,

nus,

nus, ne vertatis in vestram superbiam aut quæstum, sed adferre Domino gloriam & honorem. Non hic satis est; adferre gloriam nomini eius. Amat hostias, sed in illis vult honorari nomen suum: quod impiis Christianorum moribus dehonestatur, & conviciis afficitur inter gentes. Adorate Dominum; non opes, non imperium, non huius mundi pompas, sed Dominum. Quicquid nobis Deo charius est, hoc adoramus pro Deo. Ubi? Non solum in templis manu factis, quæ patent & piis & impiis, sed in atrio sancto ipsius, hoc est, in pura sanctaque conscientia. Nam hi demum veri sunt adoratores, qui in spiritu adorant Dominum. Multi sunt ubique, qui lignum crucis adorant osculo; qui ad Christi imaginem procidunt, qui ad eucharistiam provolvuntur, qui ad nomen Iesu flectunt genua: sed non ita multi sunt, qui adorant illum in atrio ipsius, per spiritum sanctum ædificato. Id si fecerint monarchæ, si pontifices, si cæteri primares Reipublicæ, Dominus abunde effundet in populo gratiam

gratiam suam. Hoc est enim quod dicit sermo propheticus : Dominus diluvium inhabitare facit, & ipse semper nobiscum manens, sedebit rex in æternum. Beatus cui imperat ille rex. nec enim suos deserit in æternum. Hoc protectore non est quod metuat populus, licet imbellis ac pusillus. Dominus ipse, virtutem dabit populo suo: & si maledicat illi totus mundus, cædes ac bella minitans, dominus tamen benedicet populo suo in pace, quam mundus nec dare potest, nec auferre, nisi sibi quis auferat. Ne igitur obsurdescamus ad toties vocantem Dominum, qui nunc denuo vocat nos per Turcarum, licet non insolitam, truculentiam. Et hoc inexcusabilior est nostra surditas, quod toties in clamati non expergiscimur. Gens barbara, obscuræ originis, quot cladibus afflixit populum Christianum? quid immanitatis in nos non exercuit? Quot civitates, quot insulas, quot provincias ademit Christianæ ditioni? à quanta latitudine, in quantas angustias detruxit nostræ religionis imperium?

rium? Iamque proœmia rerum eo spectare videntur, ut nidextera Dei protegat nos, brevi quod reliquum est orbis Christiani videatur occupatura. Hæc si fortuito gererentur, tamen Christiani pectoris esset, unicuilibet membro dolenti totum rei Christianæ corpus condolere: nunc vero quum indubitatum sit, tam late patens imperium, non illis virtute partum, sed nobis nostrum, ob merita nostra, diminutum; non solum ingemiscendum est omnibus, qui favent Christiano nomini, verum etiam opitulandum est fraternarum nationum calamitatibus, quæ præterquam quod ob religionis contubernium omnibus nobis communes haberi debent, periculum est ne re vera fiant communes omnium. Tunc tua res agitur paries cum proximus ardet, imo tunc totius civitatis res agitur, quum quancunque domum attingit incendium. Opitulandum igitur, sed bifariam, si vere studeamus malum depellere. Parandum est quicquid ad tam difficile bellum pertinet, sed prius illud parandum,

dum, sine quo nihil proficit apparatus ille. Frequenter arma mota sunt in Turcas, sed hactenus parum successit nobis, siue quoniam non abiiecimus ea, quibus offensus Deus sic immittit Turcas in nos, quemadmodum olim Ægyptiis immisit ranas, cyniphes, & locustas. Sive quia victoriæ spem in nostris viribus collocavimus, siue quia non Christi negotium egimus, sed adversus Turcas animo Turcico pugnavimus. Hortatur itaque res ipsa, ut de utroque apparatu nonnihil differamus, si prius nobis persuasum fuerit, Turcas, non sua pietate, non sua virtute, sed nostra socordia potissimum huc usque crevisse. Primum enim Turcarum nomen adeo fuit ignobile, ut vix apud ullum vererem reperiatur, nisi quod Plinius libro sexto, capite septimo, inter Tussageras & Arimphæos, qui ad Rhiphæos pertinent montes, commemorat Turcas, qui tum incoluerint usque ad solitudines, saxosis vallibus affines. Nec Pomponius Mela illos aliud quam nominat. Tanta erat illius nationis obscuritas, à qua
pro-

profectos probabile est, qui nunc per tot opulentas ac spaciosas regiones ambitiosæ crudelitatis pomeria protulerunt. Nominat illos & Cyprianus in libro de duplici martyrio, veluti iam tum Cæsarei nominis devotos hostes. Sunteruditi quidam, qui pro Tuscis, quos Ptolomæus in Asiatica Sarmatia recenset, existimant legendum Turcos sive Turcas. Quis enim scriptorum alius Tuscos posuit in Asia? Sed de nomine non erit interim controversia. Hoc genus hominum, cuius immanitate tot seculis affligitur & atteritur res Christiana, sicuti complures autumant, à maris Caspii littoribus, in Persidem, Asiamque minorem eruperunt, idque ante annum ab hac ætate nostra septingentesimum: nullo certo duce, sed vagi, palantesque latrociniis verius quam bello, provincias depopulabantur. His artibus exercitati, reperere conductorem Machumerum Sarracenorum principem, dignum, ut aiunt, patella operculum. Sub huius aspiciis re semel atque iterum feliciter gesta, à stipendiaria

diaria servitute ad imperium adiiciunt animum, adortique Saracenos Machumetum acie profligatum obtruncant. Hinc Turcici regni primordia. Summa rerum delata est ad Trangolipicem Mucaletum, prius Turcarum ducem: is accersita Turcarum aliorum manu, per nepotem Cucumetium invadit Arabiam, per alterum nepotem Asanum Medię regiones impetit, adversus Romanos conflicturum. Quum per neutrum nepotem res successisset, per Alcimum fratrem denuo Romanos invasit. Quę res quum illi non prorsus infeliciter evenisset, paulo post quęsita adversus Romanos occasione, Trangolipix Asiam omnem ad Euxinum usque mare partim redigit in suam ditionem, partim depopulatur. Sed rursus virtute Gallorum res Turcicę vehementer accisę fuerunt, donec existeret Othomanus ab hoc Solymanno, qui nunc rerum potitur, decimus, iuxta quorundam supputationem, vir obscuro loco natus, ac parentibus rusticis, sed ad latrocinia factus. Is per occasionem seditionum

arri-

arripuit arma Turcica, nihilo mitior
in suos quam in alienos. Hic circiter
millesimum trecentesium nostrę sa-
lutis annum exortus, intra annos 28.
non mediocriter auxit Turcicam ty-
rannidem, subacta maxima ex parte
Bithynia, nec paucis ad Euxinum op-
pidis vi captis. Huic successit filius
Orchanes, qui dissidio Græcorum
adiutus, Prusiam Græcis ademit, ac
primus in Europam traiecit, accitus
à Cantacuzeno, cui certamen erat
cum Palæologis. Ubi parricidio quo-
que ditionem auxit. Duxerat enim
uxorem Caramani filiam, & soceri
filio interempto, magnam principa-
tus eius partem occupavit. Et hic an-
nos xxii. rerum potitus, Ammuratę
filio tradidit principatum. Qui, solli-
citante Palæologo, duodecim Tur-
carum millibus in Europam transpor-
tatis adversus Bulgaros & Pelopon-
nesi principem, re sat feliciter ge-
sta, ad Europæas opes animum cœpit
adiicere: dumque simulat se Im-
peratoris hostes ulcisci, quemadmo-
dum cœperat, Genuensium navibus
ad id

DE BELLO TURCICO. 23
ad id suppeditatis, transmissio Helle-
sponto, Abydum adoritur, Callipo-
limque præter alias civitates occupat.
Mox Serviam Bulgariamque ingres-
sus, occupata Hadrianopoli, occurren-
tes hostium copias ingenti clade pro-
fligat, Lazaro Serviæ principe cæso.
A cuius servo mox ipse occiditur Am-
murates, relictis duobus filiis. Quo-
rum Pazaites Solymanum fratrem do-
lo necat, mox interfecto Bulgarorum
principe maximam eius ditionis par-
tem sibi vindicat: hoc successu rerum
inflammator, Bosphoram, Croatiam,
& ultiores Illyrici partes vastat.
Constantinopolim obsedit annis o-
cto, facile expugnaturus, nisi Gallo-
rum & Ungarorum exercitus ab insti-
tuto revocasset; quibus ad Nicopo-
lim occurrens, profligatis hostibus,
ad intermissam obsidionem rediit,
pressitque biennium, nec videbatur
relicturus, nisi nunciatum esset, Tam-
berlanem Scytharum principem in-
genti multitudine in Turcarum ter-
ras irrupisse. Cum hoc conflixit ad
Stellam montem, in Galatiæ Bi-
thyniæque

thyniæque confinio, sed infelicibus
aſpiciis, quandoquidem in eo præ-
lio cæſa feruntur ducenta Turcarum
milia. Pazaites captus, aureis cate-
nis in cavea vinctus, à Tamberlane
circumlatus fuiſſe dicitur ad extre-
mum uſque vitæ diem. Hæc acta ſunt
circiter annum milleſimum trecente-
ſimum nonageſimum ſeptimum. Ex
liberis quos reliquerat Pazaites, Ma-
chometes Orchane fratre per inſidias
ſublato, Turcicam rem occupat ſolus:
qui receptis quæ Tamberlanae abſtu-
lerat, Bulgaros & Valachos populatus,
Hadrianopoli regiam conſtituit. Ma-
chometæ ſucceſſit Ammurates filius.
Is adortus Myſiæ principem, duos il-
lius filios exoculat, ac mox horum
ſororem duxit uxorem. His auſpiciis
fretus in Valachos, Ungaros, & Ger-
manos incurſiones facit: mox in Epi-
rum verſus, Croiam armis capit, Ve-
netis Theſſalonicam adimit. Interim
ab Ungaris ingenti pugna victus, de-
cennales ab his inducias petit & im-
petrat. Quibus hortatu pontificis Eu-
genii violatis, Ungari reperunt Am-
muratem,

muratem, verum ingenti nostrorum
clade. Nam in uno prælio, quod ad
Varnam commissum est, periit La-
dislaus rex Poloniæ & Iulianus Cardi-
nal. In altero quod ad Basila fuit, cæsi
non pauci principes Ungariæ, milite
gregario ad internecionem extincto.
Nostrorum ducum tum ambitio,
tum dissidia, victoriam tradidere Tur-
cæ. Mox fratrum discordia Peloponne-
sum illi tradidit. Tandem dum Epi-
rum quæ defecerat vindicat, dum Cro-
iam frustra oppugnat, animi dolore
perisse dicitur, rerum potitus annis
triginta quatuor. Cui successit filius
Mahumetes, qui inexplibili rapacita-
te maiorum suorum tyrannidem ob-
scuravit. Duo Christianorum imperia,
Constantinopolitanum & Trapezon-
tium subvertit, regna duodecim
Christianis ademit, civitates du-
centas cepit. In his erat Chalcis in-
sula, & Scodra, quondam Veneto-
rum ditio. Capham Ponticam ur-
bem expugnavit, Rhodon insulam
tentavit, licet irritò conatu. Hydrun-
te expugnato, arma movit in Italiam,
B camque

eamque triennio misere vexavit, tanta omnium consternatione, ut Sixtus pontifex deploratis rebus, relicta urbe apostolica, fugam in Gallias adornaret. Mox in filium natu maiorem, bellum atrox moliens, periit anno millesimo quadringentesimo octuagesimo primo. Hinc inter fratres parricidiale certamen de principatu, sed victo maiore Zizimo, Pazaites rerum summam tenuit. Hic Sultanum Ægyptium bello frequenter adortus, rem infeliciter gessit, ut Turcæ fœdus cum hostibus inire coacti sint. Dehinc anno 1492. Cerauniorum montium accolæ invadit, easque gentes, ad eum usque diem semper liberas, in Turcicam pertraxit servitutem. Septimo abhinc anno, classe invehctus, Methonem, Naupactû, ac Dyrrhachium Venetorum ademittit ditioni. Quin & Foroiulienfium agros Turcæ crudelissime vastarunt. Pazaitæ regnum occupavit filius Selimus, patre depulso. Selimo, sive ut alii malunt Zelimo, successit Solymannus, nihil à maioribus degenerans. Vide vero quam illis fuerit

rit felix impietas, dum nos veræ pietatis studium abiicimus. Nos inter nos sine fine de qualibet ditiuncula bellis plus quam civilibus digladiamur, & interim Turcarum latrocinium verius quam imperium, quam late porrectum est? Ad septentrionem pontum Euxinum attingit, ad orientem Euphrate fluvio terminatur. Ad meridiem Æthiopia. Nam intra paucos hosce annos, totam Ægyptum ac Syriam una cum Phœnice & Iudæa Palæstina subegit. Ab occasu ad Ionicum mare pertinet. Hinc si ad septentrionem redeas, Danubium attingit, imo limitem hunc longe transiit, ad Borysthenem usque fluvium. Nunc mihi spectata quam variam, quam spaciosam, & opulentam ditionem hic ambitus complectitur. Tota Asia minor, duodecim non minus nationes continens; tota Thracia, in qua est Constantinopolis, priscis dicta Byzantium, olim Christianorum imperatorum, nunc Turcarum regia; duæ in Europa Mysiæ ad flumen Danubium, magna Daciæ portio, tota

Macedonia, totaque Græcia, cum omnibus Ægei maris insulis, quæ partim Sporades, partim Cyclades appellantur, sub Turcarum imperio, duram servitutem serviunt. Cretâ, nunc vulgo Candiam, Cyprumq; duas nobilissimas mediterranei maris insulas, Veneti hætenus utcumq; tenent, sed, ut accipio, tributarias. Hæc utcumque per transfennam ostensa, si quis explicet, quot olim opulenta regna, quot celebres civitates, non tam pressas, quam extinctas comperiet? Quid nunc est illa quondam beata Peloponnesus? Quid nobile totius orbis emporium Corinthus? Quid Attica, quondam, ob morum elegantiam, Græciæ Græcia dicta? ubi nunc ingeniorum parens, & optimarum disciplinarum altrices Athenæ? obscurus vicus ostenditur, sic tamen ut de nomine prorsus ambigatur. Ubi Lacedæmonia, quæ sola gignebat masculos? Quid hic pergam ea commemorare, quorum adeo recens est memoria, ut ipsæ res etiam nū oculis atq; auribus cunctisq; sensibus omnium inhæreant,

hæreant, Rhodum captam? quid toties cruentas incursiones factas in Ungariam? quid extinctum Lodovicum Ungariæ regem? quid hoc anno totam Ungariam crudelissime occupatam, depulsum regem Ferdinandum, plusquam hostiliter oppugnatam Viennam, incredibili immanitate vastatam Austriam ulteriorem totam? Summam rerum obiter indicavi. Quid si quis evolvat singula? quam truculentas clades nostras, quot Turcarum victorias, nostra damna luctusque reperiemus? Ac fortasse iam omnes Turcæ serviremas; nisi terræ filius extitisset Sophis, qui Turcarum inexplebilem rapacitatem aliqua ex parte cohibuisset; nisi parum feliciter illis cecidisset Martis alea cum Sultano Ægyptio; nisi domesticæ inter ipsos seditiones crudelitatis in nos impetum aliquantulum fuissent remorata. Unde igitur illis tantus rerum successus? Si gentis originem requiras, summam reperiēs obscuritatem cum summa barbarie coniunctam. Si imperii primordia, occurrit mercenarius miles,

B 3 occur-

occurrit nefaria perfidia trucidatus principes in cuius verba iurarant. Si progressum quæras, comperies rem crudelitate partam, latrociniis auctam, comperies funesta coniugia, comperies impia fratrum parricidia, patres à liberis regno depulso, cum perfidia coniuncta crudelitatis exempla, ut interim nihil dicam de religione & moribus. Regnant irato Deo, pugnant adversum nos sine Deo: illi Mahometem habent progugnatorem, nos Christum. Et tamen quam late propagarint tyrannidem, res ipsa loquitur. Tot ditionibus excussi, magnaue Europæ parte amissa, de tota periclitamur. Quis enim nescit quam facilis genti Turcarum terra pateat ad nos aditus? Quum enim utramque teneant Mysiam, superiorem & inferiorem, ad flumen Danubium, regiones Thraciæ vicinas; non difficilis per hoc flumen ad nos patet aditus. Dalmatas & Illyrios eadem vicinitate habet obnoxios: ne quid dicam de Pannonia, quam toties impetiit. Mari vero toti immīnet Italiæ, præcipue
vero

vero ab Epiro, Siciliæ ac Neapolitano regno. Hydruntum extremum Italiæ oppidum adhuc tenet. Brundisium aliquando tenuisse dicitur. Nunc prælusit in Austriam. Quorsum evasura, Deus novit. Et ubi interim dormiunt illa bello nata Germanorū pectora? An pietati Turcarum hic successus tribuetur? Nequaquam. An virtuti? Gens est effœminata luxu, nec alia re quam latrociniis formidanda. Quid igitur causæ? Nostris viriis illi debent suas victorias. Pugnavimus adversus illos, sed ut res ipsa clamitat, irato Deo nostro. Iisdem enim studiis arma movemus in Turcas, quibus illi ditiones alienas occupant. Trahimur regnandi libidine, inhiamus opibus, & ut dicam in summa, Turcæ pugnamus cum Turcis. Quin ipsa rerum gestarum historia satis indicat, nostris dissidiis, nostra ambitione, nostratum perfidia, gravissimis cladibus semper fuisse datum locum. Palæologi cum Cantacuzeno implacabile dissidium, Turcis aditum aperuit in Europam. Iusiurandum autore Eugenio viola-

rum, nos in funesta prælia coniecit. Siquidem & hosti servanda fides. Nec mediocriter malorum nobis causa fuit Zizimus Pazaitæ frater veneno peremptus, qui bello captus à Rhodiensibus quum in Alexandri sexti pontificis manus venisset, Carolo Gallorum regi postulanti datus est, sed prius dato veneno, quo mox periit priusquam Mediolanum pervenisset, si modo non fallit publica suspicio. Si ipsi concordēs, si purgatis animis sub vexillis Christi, illius unius auxilio freti, legitime bellum gessissemus cum Turcis, haud quaquam in tam angustum esset contracta ditio Christiana. Sed hisce de rebus suo loco copiosius. Interim mihi paucis rixandum est cum duplici hominum genere, quorum alteri perperam ad bellum Turcarum inflammati sunt, alteri perperam dehortantur ab armis in Turcam movendis. Nam utrique mihi videntur diversa quidem ratione, sed pariter tamen peccare. Ut enim non omne cum Turcis bellum legitimum ac pium est, ita incidit ubi non obsistere Turcæ, nihil

nihil sit aliud quam rem Christianam immanissimis hostibus, ac fratres nostros illorum indigna servitute pressos deserere. Quum imperita multitudo Turcarum nomen audit, protinus concipit animo graves iras, & ad eandem inflammatur, canes & Christianæ nominis hostes illos vociferans: non reputans, illos primum esse homines, deinde semichristianos, nec expendens, an legitima sit belli causa, postremo an expediat arma capere, & hostem lacerare truculentius sæviturum, nec cogitans, nullos esse perniciosiores hostes, quam impios principes, præcipue sacros, postremo non animadvertens, interdum Deum nostris sceleribus offensum, ad emendandos nos abuti barbarorum immanitate. Atque interim pinguntur nobis exempla Turcicæ crudelitatis. Atqui ea res nos admonere deberet, quam ægre sit omne bellum cum quoquam suscipiendum. Nam hic est omnium bellorum communis ludus, quibus Christiani cum Christianis tot iam annis impie conflictamur. Execramur

in tabulis immanitatem, sed asperiora
parrata sunt in Aspera, non à Turcis,
sed à nostratibus, plerisque etiam ami-
cis. Nimium recens est eius calamita-
ris memoria, nihil est necesse, ut hoc
hulcus refricem. Ergo si talia pictura-
rum argumenta nobis vere dispicent,
abiicienda est nostra temeritas, qua
tam facile procurrimus ad arma. Cru-
delius enim est quod Christiani fa-
ciunt Christianis, etiam si sint, quæ
fiunt, paria. Quale vero spectaculum
esset, si in tabulis expressa subiiceretur
oculis hominum, quæ annis quadra-
ginta Christiani parrarunt in Christia-
nos? Tantum adversus eos, qui nihil
aliud clamant quam bellum in Tur-
cas, bellum in Turcas. Nunc cum il-
lis agam, qui in diversam peccant par-
tem, errore fortassis speciosiore, sed
nihilominus pernicioso. Sunt enim
qui in totum existimant Christianis in-
terdictum bellandi ius. Quam opinio-
nem arbitror absurdiorē, quam ut sit
refellenda: tametsi non defuerunt, qui
hinc mihi calumniam struerent, quod
in lucubrationibus meis plurimus sim
in lau-

in laude pacis, ac bellorum detestatione: sed mea legunt integri; vel tacente me perspiciunt manifestam syco-
phantiæ imprudentiam. Doceo, bellum nunquam suscipiendum, nisi quum tentatis omnibus vitari non potest, propterea quod bellum suapte natura res sit adeo pestilens, ut etiamsi à iustissimo principe, iustissimis de causis suscipiatur, tamen ob militum ac ducum improbitatem, fere mali plus adferat quam boni. Plus ausus est divus Bernardus, qui mundanam militiam appellat malitiam: mundanam autem appellat, quoties ambitio, ira, aut prædæ spes ad arma provocat: ibi qui cadit, inquit, perit in æternum, qui occidit & vincit, homicida. Nunc cum his ago, quibus placet Lutheri dogma, quo censet, eos qui belligerantur cum Turcis, rebellare Deo per illos nostra scelera castiganti. Eam sententiam huiusmodi elogio notarunt theologi Parisienses. Hæc propositio universaliter intellecta est falsa, nec sacris eloquiis conformis. Falsitatem impingunt, non hæresim; nec simplici-

ter damnant, sed in universum negant esse veram. Sentientes, ni fallor, pro causæ circumstantiis bellum interim recte cum Turcis suscipi, interim secus. Quod autem ad scripturas attinet, extra controversiam esse, olim Hebræos, autore Deo, cruenta bella gessisse cum Allophylis, quin ipsum etiam Moſen auxiliantibus Levitis 23. milia suæ gentis trucidasse, ob vitulum conflatilem. Sed hic dubitat aliquis, an hoc ius transierit in Christianos, præsertim cum Hebræi fere non nisi peculiari iussu numinis bella susceperint. Cæterum si quis in totum Christianis adimat ius belli, idem magistratibus oportet adimat ius puniendi nocentes. Nihil enim est aliud bellum, quam punitio multorū per multos, si male- ficium alia ratione corrigi non possit. Sed euangelium licet adulteram dimiserit, nusquam tamen legitimum ius adimit magistratui, tametsi nusquam aperte comprobat. Cæterum Paulus gladium, qui portatur ad vindictam malorum, laudem bonorum, videtur approbare. Quod si quis tergiversetur,

tur, Paulum illic loqui de magistratu ethnico, cui voluerat à Christianis obtemperari, ne scandalum præberent euangelio, si viderentur reipublic. statum & ordinem perturbare, responderi potest, quoniam nec inter Christianos aliter potest servari reipub. tranquillitas, opus esse prophanis magistratibus, qui metu mali cohibeant scelerosos, qui legibus ac monitis non obtemperant. Quam potestatem si concedimus magistratui, belli quoque ius monarchis concedamus, oportet. Quanquam illud certissimum arbitror, omnia tentanda potius quam inter Christianos bellum oriatur, nec prorsus suscipiendum, nisi frustra consumptis omnibus remediis vitari non possit, etiam si causa sit tum gravissima, tum iustissima. Nam si libido dominandi, si ambitio, si privatus dolor, si vindictæ cupiditas bellum persuaserit, latrocinium esse constat, non bellum. Et quanquam Christianorum principum præcipuæ partes sunt bella gerere, tamen non oportet rem omnem periculosissimam suscipere sine civita-

civitatum & patriæ consensu. Quod si
necessitas inevitabilis huc hortatur, ut
omnino bellandum sit, Christianæ
mansuetudinis est, viribus totis adni-
ti, ut bellum quam minime multos
corripiat, & quantū potest minima lan-
guinis iactura quam ocissime finiat.
Laudatur enim hoc nomine Theodo-
sius Imperator, & laudatur à viro lau-
datissimo Ambrosio, quod à commu-
nione sacramentorum abstinuerit, eo
quod hostibus in bello cæsis victoria
cruenta contigisset. Atqui Romani
pro numero cæsorū hostium, sta-
tuas ac triumphos splendidiores de-
cernebant. Nec Ambrosius qui factum
hoc prædicavit in Theodosio, bellum
quamlibet necessarium iustumve pro-
bat, nisi adsit animus religiosus, to-
tam victoriæ fiduciam in Deo collo-
cans, nec aliud spectans, nisi reipubl.
tranquillitatem. Quidam nobis per-
contantibus, qui consistere possit
respubl. Christianorum, si nulli sint
qui legibus & armis protegant, mu-
tua percontatione respondere solent,
quomodo subsistit & crevit respubl.
Christia-

Christiana, quum nec magistratus haberet prophanos, nec arma, nec tormenta? Verum ut talibus initiis expediebat exoriri ecclesiam, ita nihil necesse est ut perpetuo sit idem rerum status. Crevit miraculis, quæ nunc requirenda non sunt. Quanquam ecclesiæ tranquillitatem tum temporis utcumque tuebantur ethnici magistratus. Neq; enim cuivis tum licebat Christianum occidere. Porro quod attinet ad Lutheri rationem; Si ideo non est fas Turcis obistere, quod per illos Deus castigat suorum malefacta, nec in morbis licebit accerferi medicos, quod Deus & morbos immittat ad purgationem suorum. Quin ad idem abutitur Satanæ malicia, cui tamen iubemur resistere. Fas est igitur & Turcas depellere, nisi Deus evidenti signo id fieri prohibeat. Quanquam, si nos ad bellum extimulet non reipubl. Christianæ tranquillitas, sed latius regnandi libido, aut opam cupiditas, aut similis aliqua causa, aut si nostris freti viribus magis quam Dei præsidio cum illis congredimur, aut
 si præ-

si præter conventionem, bellum irato Deo suscipi. Addam & illud : Si Deus toties in nos immittit Turcas, ut ad vitam emendatiorem provocer, nosque paramus arma, nec ea corrigimus, quibus offensus Deus nobis immittit barbarorum immanitatem, infelicibus auspiciis bellum geremus. quod hactenus evenisse perspicimus, vereor quæne in posterum atrociora videamus, nisi toto pectore convertamur ad Dominum, eique sacrificium offeramus, quod ostendit nobis Psalmus. Sed, obiiciunt aliqui, ut fas sit Christianis adversus Christianos bellum gerere, adversus Turcas non licet, quod Paulus neget esse suum, de his qui foris sunt iudicare, satis habere si de his qui intus sunt iudicet. Sed Turcæ foris sunt, nec ad ecclesiam pertinent. Quod si nobis fas est occidere Turcas, quare olim ecclesia non armavit se adversus gentes tam immaniter sævientes in professores Christiani nominis? Atqui Augustinus ne tum quidem id fieri volebat, quum nostri numero & opibus essent illis

illis superiores, intercedens etiam pro quibusdam qui Christianos occiderant, ne per Imperatorem afficerentur supplicio: nec aliam adfert causam, nisi quod ea ratione martyrum esset obscuranda gloria. Legimus, imperatores idololatrias crudelissime sævisse in fortunas & corpora Christianorum, sed Christianos armis se tutatos, aut vindictam molitos, nunquam legimus. Unico fugæ præsidio sunt usi, quod illis Dominus indulserat. Quanquam non desunt autores, quorum est Tertullianus, qui censeant, fugam non simpliciter concessam, sed ad tempus divino quodam consilio permissam, ut quoniam pauci adhuc erant evangelicæ doctrinæ præcones, illorum fuga latius spargeretur Evangelium. Quo per orbem disseminato, fugere negandi genus erat. Quod si fugere non licet, minus licet ad arma procurrare. At Christianorum vulgus perperam existimat, cuius licere Turcam non aliter occidere quam canem rabidum, non ob aliud, nisi quia Turca est. Quod si verum esset,

liceret

liceret cuivis occidere Iudæum: quod tamen si quis audeat, non effugerit pœnam legum civilium. At magistratus Christianus Iudæos punit, si quid delinquant adversus leges publicas, quibus sese submiserunt; ob diversam religionem non occiduntur, eo quod religio Christiana suadetur, non cogitur, & inseritur, non obtruditur. Hoc autem ius quo puniuntur Iudæi quemadmodum Christiani, habebant olim ethnici principes in Christianos, & nunc haberent Turcæ, si, quod Deus avertat, sub illorum ditione legitime viveremus. Proinde misere se fallunt, qui se credunt recta subvolaturos in cœlum, si contingat in prælio adversum Turcos cadere. Nisi pura sit conscientia, nec si pro Christo cervicem porrigas ad idololatriam vocanti tyranno, in cœlum pervenies. Porro tanta fuit priscorum ecclesiæ præsulum mansuetudo, ut ne relapsos quidem Iudæos vellent plebæ supplicio capitis. Id perspicuum est ex distinctione de cōsecratione 4. cap. plerique ex Iudæis. Quum enim Sise-

mandus

mandus rex comperisset, multos Iudæos, qui detestati priorem impietatem, professi fuerant fidem Christianam, non solum relapsos in veterem blasphemiam, verum etiam abominandos ritus Iudaicos exercere, circumcisis liberis ac servis suis: Consultit ecclesiæ præsules, quibus modis hoc immane scelus corrigendum esset. Responsum est illi, ex decreto concilii Toletani decimi; Tales Iudæos pontificali auctoritate correctos, ad cultum Christianæ dignitatis revocandos esse; ut quos propria voluntas non emendabat, animadversio sacerdotalis coherceret: liberos à parentum consortio separandos, servos pro iniuria corporis libertate donandos. Iam cōstat, sacerdotes nullum habere ius occidendi quenquā. At nunc blasphemia in Christum ac virginem matrem, etiam sine relapsu punitur supplicio plusquam capitali, & in hæreticum errorem prolapsus traditur incendio, etiam si non accedat crimen blasphemix. Berengarius autem in tam abominandum errorem revolutus

tus adeo non est occisus, ut nec archidiaconi dignitas illi sit adempta. Exuritur & Christianus in paganismum revolutus. Sed justius erat, Iudæum exurere, qui adulta ætate, catechismo edoctus, sponte Christum professus est, quam qui infans & insciens baptizatus. Hæc eo spectant, non ut repræhendam hodiernæ consuetudinis severitatem, fortasse necessariam, sed ut ostendam, ecclesiam, quo magis vigebat in ea germana pietas, hoc magis à bellis & capitalibus suppliciis abhoruisse. Divus Ambrosius probat in Cæsare, quod barbarorum incursionem ab Italia depulerit, nec aliter probat, nisi cum fide & religionis amore sumantur arma: quanquam, inquit, hoc non est euāgelicæ perfectionis. Vides, quam circumspecte, quamq; contanter bellum approbarit. Verum ut omne gladii ius prophanis principibus ac magistratibus adimere, nihil aliud est, quam universum reipubl. statum subvertere, civiumque fortunas ac vitam facinorosorum audaciæ prodere, ita nullo bono exemplo fieri potest, ut
sacer-

sacerdotes non dicam bellum gerant ipsi, sed bellicis negociis implicentur. Deo militant, nec implicari debent secularibus negociis. Bellum autem adeo res est secularis, ut propemodum sit ethnica. Quod si fas est sacerdotibus præliari, fas sit & carnificem agere. Nunc quum pontificum constitutiones arceant sacerdotem à medicando, qua fronte admittitur ad bellandum, cum medici studium & ars sit servare, bellatoris occidere? Exemplum autem de depellendis morbis, non per omnia congruit rei propositæ. Nam pharmacis uti, cum nullius iniuria damnove coniunctum est, at qui bello rem gerit, sic ab sese depellit iniuriam, ut aliis moliatur exitium. Quod si bellum parum iustis de causis suscipitur, aut secus quam oportet geritur, nihilo magis probandum est, quam si quis morbum maleficis artibus depellere conetur. Quin & illud in disquisitionem vocatur, an qui sibi male conscius, agnoscit morbum ab irato Deo immissum, fas sit concessis remediis morbum depellere, quum
 inte-

interim hæreat in proposito eadem
perpetrandi quæ perpetraverat. Vide-
turenim is manifeste repugnare divi-
næ voluntati. Sed ut hoc donetur, li-
cere cuique, secundum primum natu-
ræ ius, suam tueri incolumitatem
qualicumque spe correctionis, etiam-
si ob curatam valetudinem non incur-
rat novum crimen, tamen constat, il-
lum gravissime peccare, quod Dei
misericordiam ad emendationem vi-
tæ sollicitantis respuit, seseque in sum-
mum discrimen coniicit, ut non mo-
do non levetur morbo, sed gravius et-
iam malum sibi accersat. Nam arbi-
trari, medicorum arte morbum depel-
li posse invito Deo, extremæ impie-
tatis est. In simili statu sumus, si,
quum agnoscamus, nos Turcarum in-
cursionibus ad vitam emendatiorem,
ad mutuam concordiam sollicitari,
tamen in sceleribus nostris persisten-
tes, existimamus, nos irato Deo, vi-
ribus nostris calamitatem posse depel-
lere. Quod si violata fide iusiuran-
di fœderumque Turcas laceessimus,
perinde facimus, ac si egroti remediū
non

non à medicis, sed à maleficis petamus. Proinde quemadmodum fidele consilium dederit ægroto, qui illi suadeat, ut inprimis se Deo reconciliet, agnoscatque Dei manum quam promeritis mitiorem, imploretque Domini misericordiam, sumpto proposito correctionis: ita salubre consilium nunc dederit Christianis principibus, qui suadeat illis, ut, priusquam ad arma procurrant, ea submoveant, quibus offensus Deus Turcas toties nobis immittit. Alioqui si nobis nostris viribus promittamus victoriam, quid aliud quam nos ipsos fallimus, ac numinis iram magis ac magis in nos exacerbamus, Deo repugnantes verius quam ipsis Turcis? Non est autem necesse, ut ea commemorem, quæ Deum avertunt à nobis. In se quisque descendat, ac domi reperiet affatim. Concluserunt rursus Deus omnia sub peccatum, ut omnium misereatur. Alius aliis laborat vitiis, alius apertius malus est, alius tectius: Omnes tamen egemus Dei misericordia. Quæ tamen præcipua sunt & evidentissima,

tissima, maxime dissimulantur. Quæ
 sunt illa? Utinam in pauciores cade-
 rent quæ dicturus sum invitus ac do-
 lens! utinam in nullos! Ecclesiæ pa-
 store, immane, quantum degenera-
runt ab archetypo suo. Quam hic o-
 mnia vitiarunt tinearum pessimæ, am-
 bitio quæstusque! Dejn quot annis
 vidimus externos principes irrecon-
iliabilibus odiis inter sede certare?
 Pro Helena decennio bellum actum
 est inter Græcos ac Troianos. At pro
 Helena Mediolano, quanto diutius
 conflictatum est? Quid malorum non
 est passa Italia? Quibus non malis af-
 flicta est Gallia? Flent etiam victrices
 regiones. Belli, quod nobis tot annos
 fuit cum Gelris, mysterium satius est
 non attingere: nimium est quod sensi-
 mus: ac ne singula persequar, quæ re-
 gio superest, ubi non incredibili rerum
 caritate premitur tenuis plebecula. U-
 bi nunc veræ fidei, ubi Christianæ
 charitatis, ubi pacis & concordiae ve-
 stigia? Quo unquam sæculo plus li-
 cuit fraudibus, audaciæ, rapinæ,
 & imposturis? Et interim ceu germa-
 ni Chri-

ni Christiani Turcas detestamur. Si nobis succedere cupimus, ut Turcas à nostris cervicibus depellamus, prius teterrimum Turcarum genus ex animis nostris exigamus, avaritiam, ambitionem, dominandi libidinem, nostri fiduciam, impietatem, luxum, voluptatum amorem, fraudulentiam, iram, odium, invidiam, & in his gladio spiritus iugulatis, sumamus animum vere Christianum, atque ita si res postulet sub vexillis Christi, militemus adversus Turcas homines, & eodem propugnatore vincemus. Hoc enim promisit in Levitico, sed legem servantibus: persequemini inimicos vestros, & corruent coram vobis: persequentur quinque de vestris centum alienos, & centum de vobis decem milia. Tum autem fuerit Christo gratissimus triumphus, si hoc egerimus, non tam ut illos occidamus, quam ut eos in religionis ac pietatis consortium adiungamus. Tales victorias amat, qui gaudet servatoris cognomine, qui sic occidit ut vivificet, sic vulnerat ut sanet. Pium, deoque gratissi-

mum est homicidium, sic iugulare
 Turcam, ut existat Christianus; sic de-
 icere impium, ut exoriatur pius. Hic
 igitur sit scopus unicus, hoc præci-
 puum studium, ut Christi ditionem
 augeamus potius quam nostram. A-
 lioqui iugulare Turcas quid aliud est
 quàm orco litare? Possidere quod Turca
 possidet, imperare quibus imperat,
 nec aliud spectare, superbiores nos &
 avariores reddere poterit, feliciores
 non poterit, ac periculum fuerit, ne
 nos degeneremus in Turcas citius,
 quam ut illos ad ovile Christi aggre-
 gemus. Quisquis considerat præter
 Syriam ac Palæstinam tot Græciæ re-
 gna, tot Asiæ minoris provincias, in
 quibus olim per Apostolos prædica-
 tum est euangelium, nunc propemo-
 dum desolatas esse, ac barbarorum ty-
 rannide premi, qui fieri potest, ut
 non totis præcordiis indoleseat, op-
 tetque Christinomen, quod nunc in
 angustum videtur contractum, per u-
 niversum terrarum orbem agnosci, ce-
 lebrari, adorari, iuxta Psalmum, U-
 niversas nationes variis linguis, sed
 concor-

DE BELLO TURCICO. SI
concordibus in eodem templo, hoc
est, in unitate ecclesiæ, redemptori
suo canere gloriam. Nam beatus Pau-
lus nobis spem bonam concedit, fore,
ut aliquando Iudæorum pertinacissi-
ma natio ad idem ovile congregetur,
ac nobiscum agnoscat unicum pasto-
rem Iesum. Quanto magis id speran-
dum de Turcis, reliquisque barbaris
nationibus, quarum, ut audio, nulla
colit idola, sed dimidiatum habent
Christianismum. Si totum orbem tam
pauci discipuli potuerunt sub Christi
iugum mittere, non aliis instructi præ-
sidiis, quam fiducia erga Deum, &
gladio spiritus, quidni nos idem au-
xilante Christo possimus, qui præter
monarchas Christianos tot habemus
theologiæ doctores, tot egregios præ-
sules, tot cardinales, tot euangelicæ
perfectionis professores? Non est ab-
breviata manus Domini, nisi nos il-
lius gratiæ defuerimus. Exitus totus
negotii pendet ab illius nutu qui di-
xit: Sine me nihil potestis facere. Illo
protectore, unum fugient mille: illo
averso, nihil profuerit quamvis nume-

rosa militum manus, nec belli quamlibet operosus apparatus. Ergo cum primis fixa in illo totius nostræ spei ancora, nihil vetuerit humanorum consiliorum rationes accedere, quæ sic adhibendæ sunt, ut nihilo secius toti pendeamus à numinis æterni præsidii, cuius favorem frustra speramus nobis adfuturum, si titulo quidem pro illo pugnemus, cæterum re vera adversus illius voluntatem belligeremur. Ut autem intelligamus, an volente Deo bellum suscipiatur, & an prospere cessurum sit, nihil necessum est prophetas accersere, nec ad exemplum Davidis admoto Ephod oraculum cōsulere, aut ad exemplum Gedeonis triplex signum expetere. Iudæorum ac gentium est expetere miracula, non fidelium. Multo vero minus oportet exemplo gentium augures aut aruspices adhibere. Nullum certius oraculum scripturis divinis, nullum certius augurium quam mens sibi recti propositi conscia. Si gladium eximit tibi è vagina publicæ tranquillitatis studium, si fratrum oppressorū memoria,

si re-

si religionis amor, si tota victoriæ spes est in præsidio numinis, si rectus oculus non alio spectat quam ad Christi gloriam, ac Christiani gregis utilitatem, puta tibi divinitus de propitiatorio responsum, Aggredere: vinces. Sin scriptura divina reclamat animo tuo, puta, per angelum esse denunciatum ut quiescas. Si crudelitas, si proferendæ ditionis amor, si rapinæ cupiditas vocat ad arma, scito nullas aves volare posse inauspiciores. Nam etiam si quid interdum feliciter cadere videtur iis, qui talibus auguriis bellum suscipiunt, non felicitas est, sed esca fallax in graviores illectans calamitates. Interdum hoc nostris debetur sceleribus, & hominum erga Deum diffidentia, ut multæ res certam promittant victoriam, quum divinitus paretur extrema calamitas. Sic apud Homerum emittitur ἔλαος ὀνείρεος, qui Græcos victoriæ spe ad arma concitatos in summam cladem pertraxit. Sic in divinis literis legitur spiritus Domini mendax, qui per ora prophetarum omnium Achab regi Israel pro-

mitteret magnificam victoriam, quum Dominus illi pararet exitium. Nam in primo statim prælio vulneratus inter-
iit, pœnas luens non audito Micheę. Auditi sunt quadringenti prophetæ, uno spiritu mentientes, & contemptus est Micheas solus vera prædicens. A talibus prophetis & nostris monarchis cavendum censeo. Sunt enim qui ex anulis ac divinationibus promittant victorias, sunt qui per industria & gladios fortunatos, sunt qui ex ventriloquiis & astris, sunt qui ex humanis artibus præsidiisque pollicentur successum. Tot sumus inquit numero, tantum habemus machinarum: his locis aggrediemur, sic & sic fallemus hostem: adsit Deus, non adsit, nostra est victoria. Alii de suggesto sacro clamant: Ite prospere, tradet Dominus hostes in manus vestras, cornibus ferreis ventilabitis eos, donec funditus deleatis universos. Huiusmodi fortissimas voces, interdum & venales impune iactant populi periculo, ipsi procul à telis domi se continent, & culinæ ventrisque negotium agunt.

agunt. Tales olim fuisse quamplurimos belli præcones, nimium comper-
tum est. Utinam nunc eiusmodi nulli
sint. Hic fortasse videbor alicui suscep-
pisse negotium dehortandi à bello
Turcico. Nequaquam. Sed hoc ago
potius, ut feliciter bellum cum illis
geramus, vereque speciosos trium-
phos Christo reportemus. Nam nihil
aliud vociferari, quam bellum in Tur-
cas, in immanes beluas, in Ecclesiæ
perduelliones, in gentem omni scele-
rum ac flagitiorum genere contami-
natam, quid aliud est, quam imperi-
tam multitudinem hostibus prodere?
Quin ipse non semel admiratus sum,
quom de propinquo audiremus cre-
bras Hungariæ clades, nuper Ludo-
vici miserandum exitium, Mariæ re-
ginæ tristissimam sortem: nunc præter
occupatum Hungariæ regnum, tam
crudelem Austriæ vastationem, no-
stras regiones, atque ipsam adeo Ger-
maniam adeo frigere, quasi quod ge-
ritur nihil ad nos attineat. Contrahi-
mus manus, & voluptatibus ac nugis
impendimus, quas tuendis Christia-

nis impendere gravamur. Neque vero me clam est, quid hic plerique cau-
sari soleant. Toties per Pontifices
Romanos acta est hæc fabula, semper
ridiculus fuit exitus. Aut enim nihil
profectum est, aut res cessit in dete-
rius. Pecunia, inquiunt, collecta, hæ-
sit in manibus Pontificum, Cardina-
lium, monachorum, ducum, ac prin-
cipum. Nam gregario militi stipendii
vice relinquitur prædandi licentia.
Toties audivimus cruciatam expedi-
tionem, recuperationem terræ sanctæ;
toties vidimus rubram crucem, tri-
plici corona insignitam, cum rubro
scrinio; toties audivimus sacrosanctas
conciones omnia pollicentes, toties
acta præclara, spes amplissimas: nec
aliud triumphatum est quam pecunia.
Itaque quum proverbio moveamur,
esse turpissimum, bis ad eundem lapi-
dem impingere, nos plus tricies falsi,
qui possumus fidere promissis quam-
libet splendidis, toties aperte delusi?
Eadem res in totum prope alienavit
animos hominum ab indulgentiis.
Sensimus, inquiunt, meras esse nun-
dinas:

dinas: Subinde mutabatur titulus. Nunc erat res cum Turca, nunc Pontifex bello premebatur: nunc erat iubileum, quod duplicatum est, ut esset quæstus geminus: sub Alexandro etiam triplicatum est, quia forte pœnitebat nundinarum: nunc offerebatur potestas plusquam plenaria, & periclitabatur purgatorium, ne prorsus nullum haberet incolam. Nunc ædificabatur templum divi Petri in Vaticano. Nunc esuriebat Iacobus Compostellanus: nunc sanctus spiritus, ille largitor omnium, implorabat opem: nunc egebant monachi in monte Sinai: nunc offerebatur compositio clementissima debentibus restitutionem, ac iustificatio bonorum male partorum, etiam è templis spoliatis. Quid plura? Nullus erat componendi modus aut finis. Pecuniæ partem secabant principes, ut reciperent diploma Pontificium, partem decani & officiales, partem commissarii, partem qui præerant exomologesibus. Aliis datum est aliquid, ut loquerentur, aliis ut sicerent. Nec minima pars peribat inter scelerosos, ut

fere sunt, ministros ac diplomatophoros. Hos inquit lusus toties ac palam actos, & intellexit, & tulit crassus Germaniæ, crassior Galliæ populus. Quum in Flandriam occidentalem inmundasset mare, totique regioni miserabile spectaculum exhibuisset, mox præsto fuerunt indulgentiæ, quam maxime liberales. Causa movebat omnes vehementer, non nihiletiam auctoritas Hadriani nuper Pontificis. Collatum est affatim, ut ea pecunia miseris subveniretur. Missi sunt delegati qui locis inspectis renunciarent, quid quibus modis sarcendum esset. Res picturis exhibita est. Quonam dilapsa sit eâ pecunia, non est quur memorem, certe nihil impensum est in eum usum, in quem fuerat collecta. Hæc atque permulta nobis occinunt hodie, quoties suademus ut omnes monarchis adsint adversus Turcarum sævitiam: & utinam haberemus quo liquido possimus declarare vana omnia quæ prædicant. Magnis studiis actum est hoc negotium olim à multis Pontificibus, & quod mirum est, ab ipso

ab ipso Bernardo , & monacho , & sancto: nihil omissum est à Bessarione, à Pio secundo : genuit ea res multos ordines cruciferorum , designati sunt amplissimi proventus , additæ dignitates. Quid profectum sit , ipsa res clamat. Leo decimus in hoc ipsum totis viribus incubuit , dimissis per omnes Christianorum provincias legatis Cardinalibus , non quibuslibet , sed viris apprime doctis : nusquam pronis auribus audita est legatio , quum Lutherus nondum scripisset aduersus indulgentias Pontificias , nondum prodidisset articulum , aduersus Turcas belligerari nihil aliud esse , quam Deo per illos visitanti nos repugnare. Hæc eo commemorare visum est , imo res ipsa compellit , ne satis existimemus vociferari in beluas Turcas , sed ut rationem ineamus , qua fieri possit , ut posthac , si pugnandum est , felicius , quam hætenus factum est , pugnemus cum Turcis , & animos hominum non omnino nulla de causa aversos , ad officium pietatis revocemus. Nunc propius urget nos mali vis , & habe-

mus principes, non minus ditione præcellentes, quam religionis studio præstantes, Carolum Imperatorem, & huius Germanum regem Ferdinandū, ac iam tandem, utinam maturius fœderatū, Christianissimum Galliarum regem Franciscum. Nec tum pro sua pietate, tum pro cognominis honore, (nam fidei catholicæ defensor dici meruit,) defuturus est huic negotio Inclytus Angliæ rex Henricus. Orandum est, atque etiam sperandum est, fore, ut nostri misertus Dominus Iesus Vicario suo Clementi VII. mentem inserat ipso dignam, eamque confirmet, ac bene fortunet, quam præ se ferre dicitur, & à bonis creditur. Quibus rationibus effici possit, ut prospere cedat bellum, iam antea satis declaravimus, si primum omnium placemus iram Domini, si pura rectaque sit intentio, si tota fiducia sit in Christum, si sub illius vexillis pugnemus, si ille triumphet in nobis, si Dei nostri iussis obtemperantes, veluti sub illius oculis aggrediamur hostes. Nam si propter unius Achan furtum, totus populus Israel

Israel infeliciter pugnabat cum hostibus, quid nobis sperādū est, si sceleribus onusti per milites scelerosos pugnemus? qui venalem habentes animam, nihil non flagitiorū admittunt, dū prædabundi proficiscuntur ad bellum, prædabundi redeunt, aliquanto immitiores in suos quam in hostes, qui scorta circumferunt, qui in rentoriis temulenti ludunt aleam, peierant, rixantur, ac pugnant. quos non alia res elicit in bellum, quam licentia peccandi, & prædæ spes. Si volumus Deum propugnatorē, nec tales esse possumus quales erant illi milites, quales describit divus Bernardus, de quibus ambigit utrum monachos appellare debeat, an milites, tanta erat & in moribus integritas, & in præliis fortitudo: saltem animus vacet crimine, nec sub ipsius signis agentes, dominum nostris sceleribus provocemus. Ut autem talis sit miles, multū momenti est in ducibus, plurimum in monarchis: qui si spectent opes, ac latius regnandi dulcedinem, potius quam commodum Reipub.; id quod de nostris mea quidem sententia

mini-

minime suspicandum est, omnia nostra quamvis operosa molimina vergent in infelicem exitū. Item si Pontifex, quod absit, ita cogitet, proferam meum principatum, crescent ex novis Ecclesiis annatae, constabiliam regnum meum, Cardinales meos, mihiq̃ue iuratos, urbibus ac provinciis præficiam, & per hoc bellū ipsis imperabo monarchis: vereor ne magno rei Christianæ malo bellum hoc suscipiamus. Verum id ne fiat, in nobis situm est, nobis in manu est præparare animos, & Dominus dabit lætū eventum. Porro si quis crassior hæc ceu delira rideat, etiam atque etiam videat, ne rideat risum Sardonium: nec recuso videri ridicula loqui, nisi toties nobis conflictatio cum Turcis cessisset infelicitè. Et querimur nobis infelicitè cadere quæ gerimus, quum sub titulo Christi hætenus negotium egerimus satanæ, quum irato Deo sumpserimus arma? Clamat per Esaiam Dominus, & clamat nobis quotidie, quibus illa scripta sunt: Auferre malum ab oculis meis, quiescite agere perverse, & discite benefacere, & venite,

venite, atque arguite me. Promittit in-
 æstimabilia, minatur atrociam; nec pol-
 licens auditur, nec minitans. Beneficia
 dissimulamus, minas contemnimus,
 adversus castigantem queruli sumus.
 De bellis querimur, quum ipsi nobis
 bellum accersamus. Pacem sublata
 comploramus, quum pacis tranquillitate
 ad luxum, ad voluptates abutamus,
 ac nec in pace pacem inter nos
 habeamus. Quiescentibus armis ho-
 stium, fervent intestinæ similitudines, ri-
 xæ, lites, ac seditiones, & cum nemo
 cadat in prælio, multi pereunt in iur-
 giis; ac temulentia. Querimur, terram
 non respondere nostris votis, quum
 nos tam male respondeamus iussis di-
 vinis: obmurmuramus Deo, quod
 sterilecant agri, cum nos illi nihil gi-
 gnamus, præter folia, spinas, & ziza-
 nia. Miramur, assidue stillare cælum,
 quum tanta sit cordium nostrorum sic-
 citas, ut vix quisquam lachrymulam
 emittat pro commissis suis. Querimus
 de rerum penuria & caritate, quasi
 non, in quavis ubere proventu, per ra-
 pacitatem, avariciam, & monopolio-
 rum

tum artes, tum inopiam ipsi pariamus, tum caritatem? Dolemus, minus solito nasci, cum ea quæ nata sunt, non præbeantur egentibus. Postremo, de tot malis querimur, quum de bonis Deo non agamus gratias: de malis querimur, quasi male vivendo quicquam boni mereamur. Deploramus infelicitatem nostri seculi, cum in tot calamitatibus nobis vacet esse malis. Quumque non sine causa quidam divinent instare finem huius mundi: tamen non solum iungimus matrimonia, licita, & illicita, quemadmodum in diebus Noe: verum etiam epulamur, ambimus honores, venamur dignitates, extruimus, longo molimine captamus regna; latifundia latifundiis, civitates civitatibus, ditiones ditionibus, veluti linum lino connectimus. Audiamus ergo vocem Domini præcipientis, & ille audiet vocem populi ad se clamantis: Si nos fecerimus quod ille iussit, nisi ille fecerit quod promissit, adeamus eum, expostulemus cum illo, non recusat ira redargui; qui quærit occasionem miserendi. Superest,

est, ut de revocandis mortalium animis dicam nonnihil. Equidem arbitror, populum aliquanto propensio-
rem fore ad hoc bellum, si conspexerit, per summos ac legitimos monar-
chas, eosque vere concordēs, suscipi:
quorum hac in re primum ius est Cæ-
sari Carolo, cum suis satrapis, proxi-
mum regi Christianismo, tertium re-
gi Ferdinando, cui propius imminet
illa barbaries, dein aliorum princi-
pum. Nam si fas est vera loqui, huius-
modi negocia per Card. Episcopos,
Abbates, ac Sacerdotes geri, nec deco-
rum est, nec consonum sacris literis,
nec ecclesiasticis sanctionibus, denique
nec hactenus unquam bene successit.
Haud enim scio, quo pacto Mars ini-
quior est viris sacratoribus dicatis
negociis: & miles libentius paret du-
cibus prophanis, quam sacris. Deni-
que bellū habet multa stratagemata,
pro rebus præsentibus necessaria ma-
gis quam honesta, quæ tolerabilius
geruntur per homines ab Evangelicæ
perfectionis professione alieniores.
Nam bellare res est necessitatis potius
quam

quam dignitatis, licet hinc quondam omnes fere dignitatum tituli nati videantur, Comitum, Ducum, Baronū, Marischalcorum, Lantgraviorū. Hæc videlicet erant vel autoramenta, vel solatia, sese ob publicam tranquillitatem in vitæ discrimen exponentium: sed quicquid eiusmodi titulorum est, aut munerum, etiam si regum addas, longe est infra dignitatem eorum, qui in Christi vices successerunt. Quanquā & illi vicissim principibus debent honorem, & obsequium, suum munus obeuntibus. Veniam dabit vera loquente, principum æquitas; qui fere solum Pontificē agnoscunt, cum ipsis est commodum. Vitæ merita solus iudicat Deus: cæterum quod ad ordinem politicum attinet, nullus est episcopus tam humilis, quin sit quovis monarcha sublimior, functionis dignitate. Ambrosius urbis unius erat Episcopus, huic se submitit Theodosius, non venali titulo Imperator, sed tam late imperans princeps. Christus nunquam bellasse legitur, sed tradidit nobis cœlestē philosophiam, ostēdit

dit viam ad Immortalitatem, docuit errantes, redarguit incredulos, consolatus est pusillanimes, fovit imbecilles, studuit quamplurimos patri lucrificere, beneficio devinxit & dignos & indignos, sanavit omne morborum genus. Hæc est vere sublimis, regiaque functio, ad quam si conferas omnia militarium dignitatum munia, plebeia sunt ac servilia. Nō elevo principibus debitum honorem, quem agnoscit & Paulus, sed ordinem indico. Et tamen nescio, quomodo fit, ut plerique quod honorificentius est, negligant, quodque humiliter est, affectent: quum nemo tam stultus sit, ut si gemmas & aurum habeat, his fastiditis, plumbo ferrove magis delectetur. Quam male cohærent illa vocabula, Cardinalis strategus, Episcopus dux, Abbas comes, Sacerdos Centurio? Perinde quasi statuat ostēdas semigemmeam ac semiluteam, aut centaurū ex homine & equo mixtū. Non suaferim, ut cuiquā per vim ac tumultum, quod possidet adimatur: sed si Dominus hanc mentē impertiret Ecclesiæ

II
clesiæ ministris, ut sponte ditionem mundanam abiicerent; nihilo peius haberet religio Christiana, mea quidem sententia, & ipsis non paulo plus accederet tum quietis, tum dignitatis. Tantum census æquum esset illis relinqui, quantum ad honestam mundiciam, atque etiam dignitatem, sufficeret. Autoritatem adderet morum integritas, ac doctrinæ sacræ præeminētia. In hoc tantum adessent principibus, ut si quando per inscitiam, aut iram, ambitionemve, tenderent in tyrannidē, salubribus ac paternis monitis eos revocarent in viam. Eos vero, qui loco proxime ad Christum accedunt, oportebat ab his crassioribus functionibus esse purissimos. Apud Britannos summa est dignitas ecclesiasticorū, ac census opimi. Nec ibi tamen quisquam est Episcopus, aut Abbas, qui micam habet prophanæ ditionis, aut arces, aut bombardas, aut satellitium. Neque quisquam monetam cudit, præter unum Archiepiscopum Cantuariensem, idque duntaxat honoris gratia: hoc dignitatis illi promeruit mors divi Thomæ

mæ Acrensis. Nunquam bellicis negotiis implicatur, sed Ecclesiarum curam gerit. Aut vereor, ne hæc in aliis optare liceat magis, quam sperare. Nec expedit quicquam tentare per tumultum. Minus itaque diffidet populus, si viderit, legitimorum monarcharum concordibus animis rem geri, si magna pecuniarum pars committatur præcipuis civitatibus, ut ubi res urgeat, tum exhibeantur in usum præsentem: si vitetur omnis suspicio, nec hoc prætextu captetur occasio premendi libertatem, ac iura civitatum, aut regum, principumve Christianorum: si, quantum fieri potest, servetur immunitas ecclesiarum, ne fiat, ut, dum sinistris consiliis quietem nobis molimur à Turcis, civilibus bellis universam ditionem Christianam concutiamus: & dum Turcarum tyrannidem demolimur, in nos ipsos plusquam Turcicam tyrannidem accersamus. Quanquam autem sine pecuniis nullum omnino bellum geri queat, nedum hoc omnium gravissimum, tamen ita moderandæ sunt exactio-

exactiones, ut tenui populo sit unde vivat. Meminerint principes, quanto-
pere multis iam annis, bellis, sponsali-
bus, inaugurationibus, peregrinationi-
bus, ex actionibus precariis, & non
precariis, monopolis, monetæ mu-
tandis æstimationibus, aliisque titulis
compluribus, sit attenuatus populus,
exhausta civitatum æraria, quanta la-
boretur etiamnum rerū necessariarum
tum inopia, tum penuria. Quadruplo
emendandum est, si quid velis. Quis au-
tem nescit, quam seditiosa res sit fa-
mes ac sitis? Expertus est hoc olim
Moyſes. Et haſtenus vidimus, totam
fere molem exactionum rediſſe ad a-
gricolas, ac tenuem plebeculam. Iam
quosdam audio vociferari, ſpolientur
abbates opulenti, indocti & luxu per-
diti, ſpolientur epiſcopi, regias opes
male prodigentes: ſpolientur cano-
nici, ſacerdotes, onuſti, & interim
genio ſervientes. O voces ſeditioſas.
Quin eadem opera clamant, ſpolien-
tur omnes divites, ſpolientur magi-
ſtratus ac proceres? Sunt enim & in-
ter hos, & qui ſuas opes aut male ſer-
vant,

vant, aut deterius profundunt. Non
 omnes episcopi tales sunt, & aliquos
 episcopos omnino esse oportet, quem-
 admodum & magistratus oportet esse.
 Atqui exemplum spoliandi malos, fe-
 nestram aperit ad spoliandos quosli-
 bet. Æquius est, ne probi lædantur,
 improbis ignoscere, quam, dū dignis
 afficiuntur mali, bonos indigna pati.
 Ut ne commemorem, quod sæpe fal-
 lit populum, nimis pronam in ma-
 lam partem suspicionem, & quorū in-
 tolerabilis est improbitas, legitimis ra-
 tionibus posse corrigi: atque in to-
 tū pauciores futuros malos, si deligan-
 tur boni. Postremo, non magni retu-
 lerit, si male profundentibus eripiant,
 sceleratius profusuri. Vetus est hulus
 militarium, ac plebeiorum invidia,
 adversus ocium, & opes sacerdotum;
 cui si principes subministrent occa-
 sionem, nihil aliud quam oleum ca-
 mino addiderint. Bellatur, inquiunt,
 pro religione Christiana, par est, illos
 potissimum impendere. Quid ego au-
 dio? principes & populus alieni sunt à
 religione Christiana? An non hoc
 præci-

præcipue nomine principes suscipiunt principatum, ut Christianæ religionis tranquillitatem tueantur? Quod si faciunt, quid aliud præstant, quam quod iureiurando professi sunt? Ac populus dum arma capit, quid aliud præstat, quam quod sine nefario scelere non poterat omittere? Pugnamus, inquit, pro ociosis: imo pro vobis ipsis pugnat, dum pro coniugibus ac liberis, dum pro aris ac focis, ut aiunt, pro templis, ac templorum, ministris, bellum geritis. Nec illi sunt ociosi; habent functionem suam; orant, docent, consolantur, admonent, tractant mysteria; interpellant Deum pro sceleribus populi; impetrant suis precibus, vestris armis victoriam. Fateamur, illos esse ociosos, si Moses ociosus erat, quum pugnantibus adversus Amalechitas Hebræis, nihil aliud quam precabatur Dominum. Magis præliabatur huius deprecatio, quam illorum arma. Oculi prospiciunt toti corpori, manus laborant toti corpori, stomachus concoquit toti corpori, ac sibi serviunt dum singula membra
serviunt

serviunt toti corpori. Hæc eo dixerim, ut, si viris Ecclesiasticis immunitas omnino servari non potest, moderata sit exactio: quanquam iniquum non est, ut qui feuda possident, pro sua portione conferant, & qui participes esse voluerunt honoris, oneris quoque partem ferant. Ut autem citra magnum populi gravamen pecuniæ suppetant in bellum, hac ratione fieri potest, si principes impendia supervacanea resciant. id si fecerint, videbunt quantum vectigal accrescat censibus. Quis enim digne recenscat, quantum illis pereat in pompis, in largitionibus, in conviviiis, in ambitiosis legationibus, in lusibus & alea? Si sanctum ac pium existimant, belligerari contra Turcas; quam eleemosynam præstare valeant Deo gratiorem, quam si suum vectigal augeant parsimonia, & quod de strepitu detraxerint, impendatur pietati? Quod de principibus loquor, idem de divitibus quibuslibet sentiendum est. Bis gratum erit Deo, si quod pietati impenditur, vitis detrahatur. Hac ratione fiet, ut nemo largendo

fiat pauperior, & virtutis accessione
fiat opulentior. Minuet & illud popu-
li diffidentiam, si quod decretum fue-
rit, maturetur. Haftenus in colligen-
dis pecuniis adhibita est celeritas, in
negocio peragendo mira fuit conta-
tio, ne dicam cessatio. Superest, ut
paucis respondeamus his, qui dicti-
rāt, hoc bellum non pertinere ad reli-
gionem Christianam: sed de regno
Ungariæ tantum decertari inter duos
principes: quorum alteri Turca tule-
rit suppetias, sed accersitus: cui non
ob aliud faveat, nisi quod horret tam
potentem vicinum, cuius ditio videat-
ur indies accrescere: tum qui fra-
trem habeat, cuius potentia Christia-
nis etiam principibus formidini est.
Consultius, inquiunt, fuerat, regnum
illud cum Ioanne partiti, aut in totum
etiam cedere, quam tam potentem,
tamque sanguinariam gentem in Chri-
stianos irritare. Non enim sempe ur-
gendum est ius, sed interdum viden-
dum, quid expediat: interdum de
iure tuo concedere, maximum est lu-
crum, Ne dolo dicam, cessionem ipse
suasu-

fuasurus eram, si serio fuisset in con-
 silium adhibitus: at non dubito, quin
 singulari tum prudentia, tum pietate
 prædito regi Ferdinando, hac in re sa-
 tis constet sui consilii ratio. Nec no-
 strum est de parum cognitis ferre sen-
 tentiam. Verum illud expendant isti,
 num æquum existiment, ut posthac
 arbitrio Turcarum reges habeamus
 aut non habeamus, mox & Episcopos
 ex illorum commodo accepturi. Quid
 porro, si Deus, videns illorum imma-
 nitatem ad extremum devenisse, hanc
 immisit occasionem finiendæ tandem
 nunquam satiatae illius rapacitatis? Et
 si nos quiescamus, num arbitramur,
 illum quieturum, qui nunquam ces-
 savit suæ ditionis proferre pomeria?
 Iam obscurum non est, quin aliquot
 principibus suspecta sit tanta Cæsaris
 potentia, nuper etiam, Gallis devictis,
 aucta, præsertim cum non ignorent,
 quam nesciat sibi præscribere termi-
 nos regnandi dulcedo: sed hunc me-
 tum facile excludet potentia maior o-
 ptimi Cæsaris lenitas & humanitas.
 Exaudiuntur interim & aliorum vo-

ces abominandæ, qui iactant, esse tolerabilius, agere Christianos sub imperio Turcarum, quam sub Christianis principibus, ac sub Pontifice Romano. Hoc genus homines, si modo loquuntur ex animo, aut profus non intelligunt quid sit vivere sub Turcarum imperio, aut ipsi gerunt Turcicos animos, ac pœnitent eos Christianæ professionis. Scythæ & Ichthyophagi non ferebant iugum Romanæ ditionis, & nos optabimus colla submittere iugo Turcarum? Hic exaggerent quantum velint quorundam principum severitatem, rapacitatem, ac violentiam; quanta portio fuerit ad Turcarum immanitatem? Quis enim est paulo generosioris animi, qui non malit in acie oppetere, quam sub illis barbaris indignam pati servitutem. Meliore conditione sunt apud nos Iudæi, quam apud illos Christiani, quos non habent pro hominibus, sed pro iumentis. Pueros ac senes trucidant; adolescentes ac puellas, laboribus aptas ac libidini, abigunt, abactas diversim spargunt: & si quid forte coalescen-

lescentes cōtraxerint rei, rapitur quod collectum est, & ipsos alium alio dispergunt. Si quis ausit adversus illius mutire leges, diris suppliciis exanimatur. Si quis Christi nomen abneget, ita demum fit satrapas. Abiectissimi mancipii capillos in corde gestet oportet, qui tam diram tamque fœdam optet servire servitutem. Quid autem dicam de politia? Quæ legum æquitas apud illos? Quicquid tyranno placuit, lex est. Quæ senatus auctoritas? Quæ philosophia locum illic habet? Quæ Theologorum scholæ? Quæ sacræ conciones? Quæ religionis synceritas? Sectam habent ex Iudaismo, Christianismo, Paganismo ex Arianorum hæresi cōmixtam. Agnoscunt Christum, ut unum quempiam ex Prophetis. Idem faciunt Iudæi. Sed hominem tantum fuisse prædicant, quod detestabilius est Arianorum dogmate, qui Christum Deum esse profitebantur, & magnum qui Deum, sed verum Deum ac natura Deum negabant, quod existimarent nullam creaturam esse natura Deum.

Quid quod pestilentem ac scelerosum hominem Machumetem Christo, in cuius nomine flectitur omne genu, cœlestium, terrestrium, & inferorum, præferunt? Quis non prius habeat in extremis solitudinibus inter lynces, lupos, leopardos, ac serpentes vivere, quam inter tales, ubi quotidie sint audiendæ detestabiles in Christum blasphemix, ad quas arridere summa sit impietas, obticescere cruciatus morte tristior, contradicere certa mors, nec ea simplex? Procul absit ab animis Christum diligentium ista cogitatio. Si quos fatalis necessitas in eam coniecit calamitatem, ut ferendum sit Turcicæ immanitatis iugum, sit hoc extremæ tolerantix, foris servire barbaris, intus Christum servare in pectore. Tum demum exemplo Israelitarum, qui Pharaoni in luto & latere serviebant, clament ad Dominum. Imitentur beatum Loth, qui in Sodomis agens quotidie discruciabatur animo, videns & audiens abominanda civitatis illius scelera. Imitentur Hebræos, sedentes ac flentes

DE BELLO TURCICO. 79
tes super flumina Babylonis , quod
non liceret cantare cantica Domino
in Sion, quod tantum liceret psallere
Domino in cordibus suis. Imitentur
Danielem , ieiuniis ac precibus assi-
duis sollicitantem aures numinis , ut
populum suum eximat è miserando
exilio. Rursus sunt qui putant , Tur-
cam esse potentiorē , quā ut laces-
sus opprimi possit , etiam si tota di-
tio Christianorum vires suas & opes
in unum conferat : cum hydra nobis
rem fore, non septem, sed innume-
rabiliū capitum. Etiam si decem
conflictibus fuerit cōcisus, non defu-
turū milites per quos bellum instau-
ret. Adde quod bellare quemadmo-
dum illi bellant facillimum est : exu-
runt , trucidant , vastant omnia, & fu-
giunt. Exiguus grex deploratus po-
test ingentes edere clades. At sic bel-
lare Christianorum non est. Hoc er-
go bellū , inquit , quoniam uno
atque altero prælio confici non po-
test , si dureret annos aliquot , ut felici-
ter cedat , tamen exhauriet omnes
opes Christianorum, absumet fortissi-

mos quosque duces. Quod si victoria nobis tot orbitatibus, viduitatibus, ac luctibus constabit, quid futurum est, si victoria sit ab hostibus? Sed demus, inquit, omnia & celeriter & feliciter cadere ex animi nostri sententia, fingamus nostris armis occupatum quicquid usquam Turca possidet; quibus præsidiis tot regiones tuebimur? Nisi forte quis universas illas nationes interuicione delendas censuerit. Si victis parcitur, haud dubie molientur rebellionem, & si quicquid est illic hominum protriverimus, an quiescent vicini? Nam habet ille foederatos aliquot. In singulis igitur regionibus collocabimus præsidia, addemus præfectos, donec assuerint nostros imperio? Quibus eas præfecturas delegabimus? Ignavis & improbis? Res in deterius relabetur. Cordatis ac strennuis? Nos ipsos necessariis ducibus spoliabimus, nostræque opes eo demigrabunt. His ita respondendum arbitror, nec mihi placere bellum adversus Turcas, nisi huc adigat inevitabilis necessitas.

Fateor-

Fateorque vix sperandam esse victoriam, nisi Dominus à nobis steterit: quem si studuerimus habere propitium, etiam si centum congregiamur cum decem milibus, nostra est victoria. Id vero frustra nobis pollicemur, nisi per universum orbem Christianum præcedat universalis & insignis vitæ correctio. Tot sunt Christiani, qui dira necessitate premuntur iugo Turcarum: & probabile est, inter Turcas non paucos esse, quos piget barbaricæ tyrannidis: hi se facile committent fidei nostræ, si viderint paratum mitius imperium. Nam si servitus servitute mutanda est, levius fertur cui assuevimus. Porro quod quidam queruntur, Christianos aliquot principes intolerabili iugo premere suos, & indies aliquid addere sarcinæ, ut iam olim Turcicam tyrannidem moliri videantur; quemadmodum non omnino vanum est, ita optatum prorsus absque causa dici. Maiores narrant nobis, quis rerum status fuerit ante annos septuaginta: quem si conferas cum hisce temporibus,

bus, incredibile dictu, quantum de-
cesserit libertati populi, civitatum au-
toritati, maiestati senatum, ordinis
Ecclesiastici reverentiæ; contra,
quantum accreverit principum po-
tentia, quantum exactionibus: in
summa, quantum additum illi ni-
mium iactato: Quod principi placuit,
lex est. Hæc, etiamsi non narrent na-
tu grandiores, ex annalibus, & actis
non ita vetustis abunde liquent. Non
accuso principes, fortassis hoc nostra
meruit intractabilitas, ut iugo durio-
re premeremur. Gravior est querela
de proceribus Ecclesiasticis, præcipue
de his, qui Romani Pontificis nego-
cia procurant. Quorum gesta, si quis
conferat cum his, quæ veterum anna-
libus & pontificum decretis prodita
sunt, immane quantum reperiet dis-
crimen. Quod si Dominus dignetur
his immittere mentem, honoribus,
quæstu, voluptatibus mundanis su-
periores, patribus se multi libenter
submitterent, quos nunc quidam hor-
rent, ut tyrannos ac prædones. Quo-
rum animos ut ab hac suspitione re-
vocemus.

vocemus, expedit ut ecclesiæ primates ab omni specie luxus, ambitionis, avaritiæ, ac tyrannidis semet abducant. Multum increvit numerus Cardinalium, qua de re vetus iam est hominum querimonia. quibus si summus Pontifex, ut galerum purpureum mittit, ita possit & mentem Christo dignam immittere, profecto gratulandum esset Ecclesiæ. Nam ideo dicti sunt Cardinales, quod sanctimonia morum, quod eruditione sacra, quod zelo Christianæ pietatis, præ cæteris fulciant domum Dei. Debetur quidem egregiæ virtuti sua dignitas, & ad persuadendum momenti non parum habet autoritas, modo adsit Christiana synceritas. Quales inter illos esse nonnullos sperandum est; & fieri potest, ut Dominus populi votis permotus, tales reddat omnes: sed querelis hominum his turbulentissimis temporibus expedit mederi. Obmurmurant, in magno venalem titulum, cum alioqui tot Episcopos, Archiepiscopos, & Abbates opulentissimos habeat mundus. Queruntur, quicquid

habent Card., in ius Pontificis cadere; triadas ac tetradas Episcopon ac Abbatiarum, sacerdotiorum turbam, alendæ Cardinaliciæ dignitati concedi; socios esse regum, & aliquanto regibus haberi velle superiores, eoque quosdam ex his regum strepitum pro viribus æmulari, ne dicam præire. Nonnulli verentur, ne ab his exordiis eo proficiant tandem, ut si pietatem superet ambitio, ex sociis regum fiant reges, denique & regum Domini. His si quis respondeat, Quid hoc mali est, si tantum dignitatis accedat Ecclesiæ? protinus in os nobis recinunt, Satis, ô præclari, satis dominorum ac satraparum habet orbis Christianus, etiam si non conduplicentur principum ordines: patribus opus est, patres desiderat Christi grex, patrum ubique magna est penuria. Iam qui sunt lingua petulantiore, vitam quoque non verentur incescere, idque præter doctrinam scripturæ divinæ, quæ vetat in principem populi dicere convicium. Hic, cum in cæteris illis obturamus os, alia refellentes, alia in partem melio-

meliorem interpretantes. Non profe-
 rimus, inquiunt, arcana, non ca-
 lumniamur ambigua. Quæ mundo
 nota sunt, dissimulari non possunt:
 Luxum, inquiunt, ac strepitum ipsi
 nobis ostentant. Ex his vidimus schi-
 smatum autores, vidimus alios exu-
 tos dignitate, alios opibus mulctatos,
 complures coniectos in carcerem,
 nonnullos actos in exilium, quosdam
 etiam capitis affectos supplicio. Non
 deest omnino quod huiusmodi male-
 dicentia respondeatur; sed tamen ha-
 beremus animos multitudinis longe
 propensiores, & ad conferendam pec-
 uniam & præstandam operam, si pri-
 mates Ecclesiæ dignitatem suam con-
 traherent ad Christianam modestiam.
 Quin potius hoc agamus omnes,
 summates pariter & infimates ac me-
 dioximi, ut quicquid invisum est o-
 culis Dei, à nostris auferamus & cor-
 dibus, & moribus. Etenim si apud E-
 saiam averfatur victimas eorum quo-
 rum manus plenæ erant sanguinis,
 multo magis averfabitur bella no-
 stra, si viciis onustiores quam armis
 rem ag-

rem aggrediamur. Hæc eo spectant, ut si irato Deo bellum cum Turcis suscipiamus, nihil expectemus nisi luctuosum exitum, & omnium rerum miserandam confusionem: sin, quod necesse est, vitam nostram corrigamus, ut Dei misericordiam nobis conciliemus, à principibus exordiendum est. Nam ut in populo nemo sit malus, vix sperandum est, licet vehementer optandum. Ne refert quidem perinde, qualis sit miles gregarius, si monarchæ ducesque in bonum consentiant. Quod ut dominus efficere dignetur, communibus omnium assiduis precibus votisque flagitandum est. Iam sunt nonnulli, qui suspicantur, hoc obliquis artibus agere principes, ut Turcici belli prætextu, expilatis civitatibus, agricolis & plebe, oppressis legibus, extincta rerum publicarum libertate, submota senatum autoritate, protrita ordinis Ecclesiastici religione, paucorum libidine res administretur, & armis verius quam honestis rationibus agantur omnia, quemadmodum fit apud Turcas.

cas. Itaque futurum, ut, quemadmodum Octavius, Lepidus & Antonius iunctis copiis oppresserunt libertatem Populi Romani, ita post fictos tumultus iſto fœdere prodant ditio- nem Christianam, Pontifex & Cæſar, & Turca. Has impias ac ſeditioſas ſuſpiciones procul reiiciendas, ac deteſtandas, cenſeo. Mihi longe meliora pollicetur & Clementis ingenium, & Cæſaris pietas, & Ferdinandi regis integritas, & Chriſtianiſſimi Regis humanitas, & Germanorum principum fides. Terret nonnullos u-
~~niverſalis monarchiæ vocabulum, quo~~
~~videntur ſpectare quidam.~~ Ut omnia, inquit, teneamus, quæ Turca poſſidet, ſi conſulas geographorum tabulas, quantulum eſt hoc, præ his quæ ſuperſunt, aut quando ſperandus bellorum finis? Ea res male ceſſit Alexandro, nec contigit quod affectavit: magno conſtitit Romanis, nec his contigit, quod tanto molimine ambiebant. Optima quidem eſt monarchia, ſi princeps detur Deo ſimilis: verum ut ſunt hominum mo-

res, tutissima sunt moderata imperia, Christianis fœderibus inter se connexa. Alii metuunt, ne quæ nobis veniunt è Turcarum regionibus, pluris fiat emenda quam nunc emuntur. Obiiciunt de saccaro, quod nunc quadruplo pluris emitur, idque corruptius, ac periculum esse putant, ne idem accidat in cæteris omnibus. Sed hoc quoque non dubito, quin Cæsaris æquitati sit curæ futurum. Nec enim par est, ut impendia gravent omnes, compendia redeant ad paucos. Hic argebit aliquis; Quid, inquires, agis hoc tam prolixo sermone? Dic exerte, censes bellandum, an non? Si mihi loquutus esset Dominus, pronuntiarem expedite: nunc, quid optem, proclive est dicere; quid futurum sit, non item. Attamen nec præscius eventus, nec satis cognititas habens negotii circumstantias, monarcharum prudentiæ materiam suppedito, vigilantius super hac re deliberandi. Nec bellum dissuadeo, sed ut feliciter & suscipiatur, & geratur, ago pro mea quidem virili. Quum enim

enim negotium ordiamur omnium periculosissimum, aut in summum orbis Christiani malum exeat oportet, aut summam adferat felicitatem. Quid, feremus igitur impune quæ Turcarum immanitas in nos & fecit tot seculis, & facit, & facturam minatur? Durum quidem fateor, sed hoc tamen quamvis durum ferre præstat, si ita visum est Domino, quam nobis panoletiriam accersere. Illud in primis erat optabile, Si liceat Turcarum ditiones ita subigere, quemadmodum Apostoli cunctas mundi nationes subegerunt imperatori Christo: proximum esto votum, sub armis hoc potissimum agere, ut se victos esse gaudeant. Ad id præcipue conducet, si viderint, Christianismum non esse verba, sed in nobis conspexerint animos ac mores Euangelio dignos. Tum si mittantur in messem integri præcones, qui non quærant quæ sua sunt, sed quæ Iesu Christi. Postremo, hi qui nondum possunt alligi, sinantur aliquandiu suis vivere legibus, donec paulatim nobiscum coalescant.

lescant. Sic olim Imperatores Christiani paulatim aboleverunt paganismum. Initio patiebantur illos æquo cum nostratibus iure vivere, sic ut neutri alteris facerent negocium. Deinde templis idolatrarum ademerunt sua privilegia. Postremo victimas ab illis immolari palam vetuerunt, mox omnem simulachrorum cultum submoverunt. Ita sensim invalescente nostra religione, paganismus extinctus est, & Christi Trophæa mundum universum occuparunt. Hæc ex nostris literis, quibus non optime cum bello convenit, ad te scribere visum est, vir clarissime; quo tuum provocarem ingenium, ut ex legum oraculis, in quibus tu præcipuam laudem obtines, nobis meliora proferas. Quod ut facias, te etiam atque etiam rogo. Rem facies non alienam à Rinckorum cognomine; quorum hæc omnium consensu præcipua laus semper fuit, quod unice studio habuerint, habeantque, de Repub. quam optime mereri. Dominus Iesus te, cum tibi
cha-